

四庫全書

史部

欽定四庫全書

平定準噶爾方略前編卷四十二

乾隆元年夏五月庚子

命治護送夷使都司蘇隆等罪

署寧遠大將軍查郎阿奏言準噶爾使臣吹納  
木喀等于四月十三日自軍營起塵都司蘇隆  
守備馬瑞隆率官兵百名護送出卡十五日吹  
納木喀遣人前行探覓水草至噶順地方遇自

準噶爾部脫歸綠旗兵一人跟役一人吹納木  
喀即執之與蘇隆等言現在方議和好此二人  
又恐敗事我等請攜以歸蘇隆云二人在爾部  
日久

天朝大國視此等人本無關係即聽攜去竊思二人  
被掠久受艱苦始乘間脫歸將及大營自應與  
之俱還訊問始末請

旨安置豈有聽從夷使攜去之理且伊等實我之兵

役非準噶爾部人私脫者比夷使恐其洩漏彼處消息故托詞詭詐蘇隆等何竟墮其術中即吹納木喀等必欲攜去噶順地方去大營僅二百餘里亦應遣人速赴軍營告知定奪蘇隆等率官兵百人夷使不過二十餘人何至畏之如虎隨聲附和若此況職在護送自應撥兵前行防察一切遇此等脫出者何難別置他所不令若輩得見乃先事不能豫籌臨事隨人指使急

忽玩候慢不經心所宜據實糾劾奏入得

旨蘇隆馬瑞隆著革職拿解來京嚴審定擬具奏該  
部知道

甲寅

命分別籌辦駐防撤兵事宜

定邊大將軍慶復等奏言臣等議留索倫巴爾  
虎兵二千名令齋三率領一千駐劄額克嶺綽  
起圖等處托勒德爾率領一千駐劄烏里雅蘇

台料理運送什物至綽爾多蘇爾泰所領奉天  
兵一千傳達禮所領吉林烏拉兵一千令隨額  
駙策凌駐劄鄂爾昆附近有水草處李如栢所  
領綠旗兵一千內有山西兵五百即令李如栢  
率之守鄂爾昆城直隸兵五百令遣副將等一  
人率之防守塔米爾城其暫留烏地兵丁及罪  
人等令卓爾周英管轄暫留烏里雅蘇台及察  
罪廩爾綠旗兵一千令高翰管轄並俟青草發

生時遣歸駐劄鄂尹宸特里默然爾喀兵一千  
五百以一千人留駐烏里雅蘇台于喀爾喀叅  
贊貝勒中用一人更番管轄餘五百人駐鄂爾  
昆于喀爾喀副將軍亦用一人更番管轄其撒  
回官兵請如去年發還官兵例應領馬匹各減  
半辦給滿洲家選兵丁舊例人給馬三匹今減  
一匹各給二匹去年漢軍人給車腳銀十二兩  
今軍營馬匹甚多亦請人給馬二匹到京後赴

本旗滿洲都統繳還至綠旗兵人給車價銀六  
兩其各項兵丁運載軍器什物亦給車價銀六  
兩分給口糧如前計算抵其原處遠者七十日  
其次六十日近者五十日種地及罪人攜帶妻  
子者每口給車價銀四兩大口日給米八合三  
勺小口半之定于五月初九日以次起行此次  
撤還官兵雖或未經戰陣然在營効力並已數  
年中亦有在額爾得尼招等處臨陣者請定以

三等與前番一體揀選酌用總理王大臣等義  
應如所請奏入

上從之

六月己巳

命加恩議叙有功弁丁並寬免虧項之可原者

上諭總理王大臣等曰自雍正五年用兵準噶爾以  
來大臣官弁兵丁俱軍前効力有年今軍務已定  
除功績顯著毘寇効力已經加恩外尚有應加恩

者著總理王大臣等查明分別將如何加恩之處  
議奏再軍需各項虧空當辦理紛紜之際自應從  
嚴俱著落追賠但其中情事固有輕重其情重應  
賠者仍令追賠若情有可原應加寬免者著王大  
臣等查明分別議奏王大臣等奏言大將軍及各  
大臣等現在議叙陞賞其文武官員兵丁平郡  
王與查郎阿等已核明分一二等送部議叙此  
外或有未獲沾

恩者請令總督查郎阿劉於義額駙策凌詳悉核實  
報部議叙如例又虧空軍需錢糧雖與尋常不  
同但其中或有出于不得已挪用虧空者亦有  
核減浮用責償者其案牘具在乞令該部會同  
察核詳議奏入

上諭之尋策凌覆奏言臣等詳勘自軍興以來凡勞績  
顯著奮勉出力者量其事跡悉已施

恩並無遺漏之人查郎阿覆奏言武忱五十九佛保

來成德高偉五人及黑色僧保常明柱索鷗等  
四人並列一等伊昌阿賽音察克詹布道德常  
明七十五巴顏福黑達色等八人並列二等奏  
入報

聞

命以待衛等巡察卡倫

定邊大將軍慶復奏言前者戍兵駐烏里雅蘇  
台喀爾喀游牧未經內移是以巡視卡倫即用參

贊大臣等二人並協理台吉一人周圍察閱今  
既移戍鄂爾昆喀爾喀游牧亦內移自南至北  
道途幾數千里未便仍令大臣巡視嗣後叅贊  
大臣等至喀爾喀游牧處止同副將軍等閱兵  
及核驗器械軍裝其巡察卡倫請以侍衛二人  
台吉二人分道前往叅贊大臣駐烏里雅蘇台  
以待事畢報副將軍後即還大營總理王大臣  
議應如所請奏入

上從之

丁亥

命免運糧車駝戶及商人應追腳價銀兩

上諭總理王大臣等曰從前北路軍需內有運送科

卜多截留察罕廋爾等處應追腳價銀二萬九千

餘兩雖係商人承領而起運之時全數給發是以

截留之後在於車駝戶名下著追已還過銀一萬

四千餘兩尚有一萬四千餘兩未完朕思車駝戶

較商人更為貧苦現今大兵既撤營運無多完項  
自屬艱難且多係並無家產之人朕心深為憫惻  
著將前項未完銀一萬四千一百四十四兩九錢  
俱行豁免又商人趙位侯等于觀音保運送軍需  
案內除十二累李成功腳價應行扣還外其餘數  
案多係因公賠累情節亦有可原且該商從前續  
辦軍需有節省銀二萬兩著該部查明即以節省  
之項抵補免其著追

秋七月壬申

命擢賞侍衛阿南達等

上諭總理王大臣等曰北路撤回之厄魯特二等侍衛阿南達三等侍衛巴當前在軍營頗知奮勉數次臨陣斬獲賊衆著有勞績曾經保送著加恩各陞一級阿南達授頭等侍衛巴當授二等侍衛其侍衛濟木巴等亦頗著勞績著一體加恩二等侍衛濟木巴阿喇卜珠爾阿喇卜坦俱授頭等侍衛

三等侍衛巴顏授二等侍衛藍翎侍衛沙禮授三等侍衛鄂勒錐原係頭等侍衛著賞銀三百以示朕軫念軍營鼓舞効力人員之至意

甲辰

命免兵丁應賠馬匹

上諭總理王大臣等曰軍前撤回官兵所給馬匹定數之外有倒斃者例應賠償念其軍營効力勞苦多年此項馬匹沿途倒斃著加恩免其賠補

鎮安將軍常賚等奏報撤回兵自巴里坤起程  
次第

常賚等奏言臣等按各營遠近定巴里坤起程  
次第第一隊叅將盧度瑾等率陝西督標兵九  
百四十三名由中北路六月二十日起程第二  
隊副將王能愛等率固原標協兵二千六百四  
十六名由正北路副將陳經綸等率延綏兵九  
百二十九名由中北路並二十二日起程第三

隊總兵官周一德等率勇健營兵一千一百七十名由正北路副將王翰京等率西寧兵八百一十一名由中北路並二十四日起程第四隊總兵官楊竑等率涼州兵一千三百一十三名由中北路叅將宋宗璋等率甘肅提標兵九百四名遊擊吳邦侯率安西土古魯坐卡兵三十名由中北路並二十六日起程第五隊總兵官張朝良率肅州兵一千二百九十名由中北路

臣常賚顏清如馬會伯及員外郎僧保等副將  
韓良卿等率寧夏兵九百九十名殿後彈壓進  
口並二十八日起程至駐劄哈密換班兵丁五  
月中新兵已到遊擊孔以智等率舊駐兵一千  
名由中南路還安西先于六月十三日起程訖  
奏入報

聞

丁巳

命豫備防賊事宜

定邊副將軍額駙策凌奏言六月二十八日夜忽有賊至沙扎海卡倫盜馬一百二十五匹護軍熙卜求等跡之逃去本月初八日清晨賊兵百餘來窺卡倫熙卜求率蒙古兵登山據險鳥鎗齊發賊繞山遠伺日昃始去臣等伏思賊兩次潛至沙扎海卡倫或未知我撤兵虛實輒來探聽或將大隊設伏先以少兵誘我均未可定

已令哈岱於烏里雅蘇台等處豫防賊即猝至  
無輕與戰臣等亦率兵由鄂爾昆出屯塔米爾  
等處嚴整以備奏入得

旨知道了凡事俱宜深思應機從事慎勿輕舉又

諭總理王大臣等曰額駙策凌此奏可抄示查郎阿  
劉於義常賚樊廷等知之令其防範准備

八月戊辰

命免甘省州縣追償草束驢頭銀兩

上諭內閣曰西陲用兵以來軍需浩繁有司承辦匪  
易其中實有浮冒情弊者自應著落賠補若事屬  
辦公情有可原者則當開恩寬免以示體恤朕聞  
甘省地方前因岳鍾琪檄令豫備喂養馬駝草束  
有司不得不遵照辦理後因買備多餘責令變價  
還項而露積日久草已霉爛隨經岳鍾琪有請照  
燒柴變價之奏又經許容有十分豁免三分之一請  
朕思草束豈能久留事歷多年必至腐朽州縣實

多賠累著署總督劉於義悉心確查除從前已經完補外其現在著追者即全行豁免又聞巴里坤駐兵時岳鍾琪檄令臨鞏甘涼等府買驢三萬頭以抵羊隻之用後因驢頭不能遠行將各州縣解過驢一萬四千餘頭止收六千餘頭其餘托言瘦小退回變價所有沿途餽養草束俱不准開銷今價值尚未清結州縣實屬賠累此項亦著劉於義確查具奏將應行豁免者全行寬免俾州縣同受

國恩益得盡心于職守以昭朕優恤甘省有司之至意

己巳

諭喀爾喀等游牧毋遽外徙

上諭總理王大臣等曰西部喀爾喀等原在茂岱察罕廈爾扎卜堪河等處游牧因準噶爾厄魯特等久懷窺伺之意我

皇考聖慮周詳念喀爾喀等若不豫令內徙賊來侵犯

伊等游牧處不能一時就便遷移則人畜受傷而賊反獲利是以屢降

諭旨交大將軍及喀爾喀副將軍等將喀爾喀游牧內徙之處詳查定議具奏尋議喀爾喀等俱各向東移徙外以杭愛之陰塞楞額多懽鄂爾昆之鄂圭淖爾為界內以杭愛之陽翁金河古爾班賽堪等處為界去年喀爾喀扎薩克圖汗格勒克雅本丕勒奏稱伊所住哈魯納地方既無野獸又牲畜不

得孳生乞移住于舊游牧推河伊克鄂拉翁金等處經大將軍議奏准其外徙現今噶爾丹策零遣使求和我大兵以次撤回止留兵駐防邊境念準噶爾素與喀爾喀為讎寧保其不相侵犯自宜豫為之備喀爾喀等不知其故以為既經和好大兵全撤思念原游牧處漸欲向外遷移但計地方遼濶游牧從容不思居可虞之地被賊殘害牲畜擄掠子女之患是見小利而不知大計者也準噶爾

定界之事尚在未決喀爾喀等之游牧且令勿遽  
挪移著額駙策凌等戒諭喀爾喀扎薩克人衆仍  
駐原駐之地禁其踰界游牧此亦為喀爾喀起見  
非欲竟棄其地也俟數載後準噶爾大定絕無可  
慮度量情形必令伊等仍移本處臨時再降諭旨  
準噶爾部人孟克來降

命賞給安插如例

戊子

準噶爾部人恭格敦多卜來降

命賞給安插如例

九月癸巳

準噶爾部人白勒克達什來降

命賞給安插如例

丁酉

命恩免陝甘兵丁應扣借給製造器械銀兩

上諭總理王大臣等曰陝甘標營派出操演之兵所

需器械有應製造添補者前經川陝總督查郎阿等奏請借給兵丁銀兩備辦于餉銀內分年坐扣朕思陝甘各標營自西路用兵以來出征者既効力行間存營者亦差遣繁重今操演各兵所需器械既據查郎阿將各項收貯之軍器可以撥給者併堪以修補者俱逐一查明料理其所需修補工價併添製器械所用銀兩著免其在各兵餉銀內坐扣工完之日據實造冊報部作正項開銷

命加賞駐藏及哈密官兵

大學士川陝總督查郎阿奏言西北兩路軍營  
及苗疆大臣等

恩詔賞俸半年兩路出征兵丁又奉

上諭賞給一月錢糧按駐藏及駐哈密官兵丁遠  
戍已久與出征官兵一體効力請如西路軍營  
例一體加恩總理王大臣等議應如所請奏入  
上從之

冬十月丁卯

準噶爾部回民托克托迷什來降

命賞給安插如例

庚午

命內閣學士雙喜留京以布蘭泰管理軍營糧務

壬申

加恩兵丁孫海龍

上諭總理王大臣等曰據提督樊廷奏稱興漢兵丁

孫海龍于雍正八年在鏡兒泉出兵受傷被準噶  
爾擄去屢欲脫回為賊所阻今于本年八月始得  
乘間脫回等語孫海龍受傷被虜久羈賊穴今始  
脫回情屬可憫著查郎阿拔補把總在行伍効力  
辛巳

命寬扎薩克等輸納羊隻之期

上諭總理王大臣等曰總管覺和托奏請喀爾喀扎  
薩克等牧放官羊應令交送十萬隻以補蘇魯克

所缺額數經爾等議奏十萬羊隻以遽令如數輸  
納恐一時趣辦不及請明歲先令交送五萬隻其  
餘五萬隻戊午年再行交送業經依議行文辦理  
此項羊隻雖係官價備辦令其牧放但念蒙古人  
衆藉以孳生取乳于生計頗為有益若明年即令  
交送一半彼等遽失所利恐致拮据著行文額駙  
策凌等將明年應送之五萬隻展限戊午年送至  
其餘五萬隻于己未年送至

丙戌

準噶爾部人丹津率妻子等九人回民和卓木  
已勒第同來降

命賞給安插如例

命阿成阿統理烏里雅蘇台駐兵

定邊副將軍額駙策凌奏言貝勒策卜登率喀  
爾喀兵一千駐烏里雅蘇台已屆換班之期其  
應往代者叅贊公敏珠爾等或有兼署或經赴

京無人可遣乃策卜登不候交代擅還本處合  
行奏

聞叅處又烏里雅蘇台係三路通衢最關緊要請以  
滿洲大臣一人駐劄總理喀爾喀叅贊貝勒公  
等更番協理于特爾奇所駐二千索倫兵內選  
撥一千駐之總理王大臣等議覆曰策卜登不  
俟交代擅還本處請令理藩院議處策凌知換  
班無人不行知會亦屬不合應飭行烏里雅蘇

台應如策凌所奏用滿洲大臣一人統理謹以  
軍營大臣等職名開列恭候

欽點奏入得

旨所議是著阿成阿前往

戊子

命蠲陝甘兩省明年額賦

上諭內閣曰西陲用兵以來陝甘百姓轉運糧餉急  
公効力甚屬可嘉已蒙

皇考疊沛恩膏厚加撫恤朕即位之初又將乾隆元年  
甘肅額徵錢糧全行豁免西安等屬豁免一半今  
朕復思大兵既撤正與民休息之時若再寬一年  
額賦則民力更可寬餘安居樂業著將乾隆二年  
甘肅錢糧全行蠲免西安等屬錢糧蠲免一半以  
示朕加惠秦民之至意

十二月庚寅

命員外郎諾敏等辦理安插回民

先是查郎阿奏言安插吐魯番回人等並係安  
西總兵官辦理不能通曉回人性情言語請如  
哈密例令理藩院遣章京二人專辦總理王大  
臣等議應如所請開列理藩院章京引  
見得

旨依議著員外郎諾敏筆帖式色克圖前往

準噶爾台吉車林率妻子等五人又厄魯特烏  
巴什率親屬等十七人又巴顏瑚魯什達庫楚

克三人來降

命授車林為三等侍衛餘悉賞給安插如例

壬辰

命詢準噶爾降人綽羅岱等

準噶爾部人綽羅岱巴克根敦三人來降奉

旨觀此三人所供視前投誠者語較明白俟到日再行細問具奏其有應行施恩之處著從優給賞尋王大臣等詢問覆奏言據綽羅岱等云自吹納

木喀歸知

大皇帝欲以阿爾台山為界噶爾丹策零集宰桑大  
台吉等議小策零敦多卜言歷年既苦用兵本  
境足以游牧宜讓與

大國為便其伯父之子大喇嘛拉卜立木言我出  
家人不知此事但我屬人日漸窮困

大國必得阿爾台方許和好我意以和為美餘多  
阿諛噶爾丹策零者故其意亦未定又云策妄

阿喇布坦死噶爾丹策零佯言為其妾塞特爾  
札卜所毒遂殺之并殺其所生四子四女現在  
與土爾扈特絕不來往與哈薩克布魯特並為  
讐敵凡準噶爾部人無不以定界和好為樂者  
奏入

命安插綽羅岱等如例加賞袍帽銀緞有差  
丙辰

命加賞駐防兵製辦冬衣銀兩

上諭總理王大臣等曰現今兩路大兵已經撤回而鄂爾昆烏里雅蘇台尚有駐防之奉天兵二千名寧古塔兵一千名黑龍江兵二千名綠旗兵二千名喀爾喀兵一千五百名屯種綠旗兵六百名哈密尚有駐防綠旗兵五百名共一萬四千一百名俱各戍守邊疆際此嚴冬卡倫瞭望偵探巡查倍覺寒苦朕心深為軫念著每名賞給銀三兩為製辦冬衣禦寒之具該管大臣即于軍營存貯銀內

按名散給務令均沾實惠

十二月庚申

命布蘭泰留京侍養

上諭總理王大臣等曰前令布蘭泰往北路管理糧餉事務聞布蘭泰之母年已七十有餘著令留京侍養其糧餉事務著常安自備資斧前往管理

戊寅

定議北路軍營善後事

總理事務王大臣等奏言前奉

上諭以果親王平郡王公慶復尚書海望來保都統  
傅爾等奏摺令臣等從容議奏據諸臣所奏有  
請盡撤北路防兵者有請更行增兵者有請留  
現在兵丁者人各異見按現在鄂爾昆駐兵七  
千有餘喀爾喀防秋兵三千烏里雅蘇台駐兵  
一千喀爾喀天性怯懦若大兵盡撤則內失憑  
依外生疑貳賊人譎詐不無乘間滋事留兵所

以安喀爾喀之心其勢既不可盡撤但增兵本  
為防守之計而現在既不進剿又何用多兵且  
所在皆蒙古游牧之地兵多則有礙牧放所需  
糧餉運送維艱且靡費無益也方今準部兵食  
兩絀内外交訌又去北路甚遠冬時冰雪豈能  
涉遠冒險而來若夏秋之交率兵數千擾我邊  
境則烏里雅蘇台與鄂爾昆各有駐兵自可互  
為聲援倘更深入扎薩克歸化城之兵不難刻

期調集烏里雅蘇台兵截其歸路扎薩克歸化  
城兵相為犄角鄂爾昆兵乘間夾攻賊人遠來  
疲弊盡殲何難賊雖至愚必不出此下策是戍  
兵又不必復增矣所有果親王請發京兵協助  
蒙古別自防守來保請于額爾得尼招駐兵一  
萬及傳鼐請盡撤鄂爾昆戍兵之處悉無庸議  
留戍兵中奉天寧古塔黑龍江五千人並三年  
當代但此三處兵丁皆熟練戎行若盡易新兵

恐未練習請于明年先更代二千五百人又明年再更代二千五百人其慶復請撥呼倫貝爾索倫兵海望請撥索倫已爾虎及內扎薩克與牛馬羣察喀爾兵之處臣等詳悉叅酌明年換班時應撥察哈爾兵一千五百以在京副都統一人率之撥呼倫貝爾索倫兵一千以黑龍江副都統一人率之往代又明年選東三省兵二千馬羣兵五百往代如此則新舊相間勞逸既

均而防戍兵亦皆精練又來保請每年七月撥  
歸化城等處兵五千至額爾得尼招駐劄按歸  
化城等處兵有事自可徵調若無事輒調多兵  
遠涉沙磧徒滋煩擾無益戎行應毋庸議又平  
郡王奏防秋兵三千人喀爾喀七旗中獨扎薩  
克圖汗部落在拜達里克西南駐牧正鄂爾昆  
之屏藩當令于附近駐防若撥往鄂爾昆名為  
進守反失其外障實屬未便且鄂爾昆即有徵

調相去甚近無難立止按防秋兵自當相度便  
宜豫定規條庶幾臨期不悞應如所請令額駙  
策凌辦理又平郡王慶復並稱內地扎薩克沿  
磧南而居與喀爾喀接壤亦當令其發兵防秋  
與喀爾喀互相應接按臣等原議以扎薩克等  
為協濟之兵其兵數亦當議定應如平郡王慶  
復所請令內扎薩克等每歲量撥兵二三千人  
防秋又果親王請豫令內扎薩克等各以撥兵

豫備之數及率兵之王台吉等名次某處兵由某路而進悉行定議造冊報部亦應如所請辦理又平郡王請東三省及喀爾喀兵每年於青草發生時令向西北數百里外伊克達巴罕烏蘭達巴罕齊老圖等處水草豐裕之地牧放駝馬教習田獵至秋還營如此則鄂爾昆近處之草不至匱乏可備冬春畜牧之用此議自屬可行請令額駙策凌辦理又平郡王及慶復並稱

歸化城防兵亦應撥一半令于青草發生時出  
數百里外牧馬教獵以助鄂爾昆聲勢此奏應  
俟歸化城駐兵議定後再議又歸化城防兵所  
需牧放馬匹前以平郡王奏請蒙古兵現存馬  
匹令于中途牧放備用臣等議如所請歸化城  
倘或需馬可即以此刻期取用又戍兵口糧必  
當充裕屯田最要鄂爾昆地界寬廣大可耕種  
若撥兵三千人人各種二十五畝計可墾田七

百五十頃以畝收五六斗計算可得數萬餘石  
少亦二三萬石現在軍營所貯尚支數年之用  
至數年後所需自當豫計今平郡王慶復所奏  
請于鄂爾昆附近屯田所見略同請以原摺付  
軍營將軍叅贊大臣等按可墾之田詳悉定議  
更用專官辦理屯務奏入

上從之

平定準噶爾方略前編卷四十二

欽定四庫全書

平定準噶爾方略前編卷四十三

乾隆二年春正月壬子

命殷扎那等率駐防兵赴北路更代

總理王大臣等奏言前者臣等議乾隆二年撥  
赴北路換班兵二千五百名其察哈爾兵一千  
五百名應遣京城副都統一員率之索倫達呼  
里兵一千名應遣黑龍江副都統一員率之謹

開列職名伏候

欽命其兵丁應給口糧馬匹請照例支給奏入得  
旨著殷扎那圖那去餘依議

二月己未朔

命暫留換班兵協力防秋

上諭王大臣等曰去年七月內準賊侵我卡倫掠去  
喀爾喀二人今秋宜嚴加防範現在派往換班察  
哈爾兵一千五百名黑龍江兵一千名令於五月

初間由本處起程七月初間務到軍營著行文額駙策凌等俟換班兵到日將換回兵丁暫行留駐協力加謹防範俟過七八月緊要之時再將伊等發回今年準夷若復侵我卡倫應令額駙策凌將明年應如何防範之處先期定議具奏再西路應如何豫備之處亦行文大學士查郎阿令其先事詳議具奏

辛酉

恩免西寧等鎮官兵應追銀兩

上諭內閣曰據劉於義奏稱西寧鎮有原調援勦撤回官兵二百三十九名於雍正十二年并乾隆元年節次派撥出口所有原領俸賞銀兩似應准其抵算又大通鎮撤回未經續派兵丁七十七名領過賞銀一千七百兩前曾另行派調將賞銀追給頂派各兵查頂替之兵遠役塞外俱經製辦行裝費用無存可否加恩免其追繳等語征兵借支銀

兩前已降旨盡與豁免今西寧大通官兵應追銀兩著照劉於義所請一體加恩免其追繳

癸酉

準噶爾部人恭格來降

命賞給安插如例

三月乙卯

額駙策凌奏請明年東三省兵二千名牧廠兵五百名當代還者亦令於防秋後九月遣還奏

入

上從之

夏四月壬午

命額駙策凌移書曉諭噶爾丹策零

定邊副將軍額駙策凌奏言據貝勒青滾雜卜

報三月初十日噶爾丹策零遣人送還去秋被

掠津巴鄂羅思且有致車臣汗等書一通送至

軍營臣等譯來書言前

大皇帝賜書令我等游牧不得過阿爾台其蒙古屬  
人居住如故如此則遣使不如此則不必遣使  
想非出

大皇帝旨特喀爾喀台吉等疑我逼處阿爾台有害  
爾等游牧慫恿部院大人為此耳竊思阿爾台  
乃我祖父所貽故難讓給自今和好後彼此雜  
處何妨若欲興兵構怨雖遠亦可至也前此相  
爭爾我兩傷用兵何益况

大皇帝為爾出兵爾喀爾喀自當供應即我兵至時  
口糧亦不免取給於爾去年因爾等卡倫逼近  
阿爾台我邊界人遂生疑惑擒爾二人嗣後爾  
等卡倫宜稍內撤無近阿爾台游牧或致生事  
爾蒙古台吉等當告知內地部院大臣奏聞

大皇帝惟以廣行黃教休逸羣生為意爾若以書覆  
我可於秋九月發來又據津巴言去年七月初  
八日我與鄂羅思為賊所掠至伊犁今年正月

初九日見噶爾丹策零給書一通令致車臣汗  
給衣一襲并還前所掠馬駝器械撥十人護送  
即日起程二月二十日至薩里鄂羅思道病死  
我於三月十四日至博托和尼和羅卡倫臣等  
詳察噶爾丹策零掠我二人今又送還蓋因

勅書所諭甚明不便復遣使來藉此致書於臣冀得  
奏聞

皇上書中所言仍欲得阿爾台似應覆與一書或以

臣等奏

聞更降

勅諭或竟作臣等意見覆書開示伏候

睿鑒總理王大臣等議覆日準夷此舉大有窮迫向  
化之意但阿爾台斷不可與前此

勅書業已詳備無庸再給應令額駙策凌作書答之  
臣等恭擬呈

覽奏入

上從之尋進所擬額駙策凌與準夷書曰固倫額駙  
策凌致書準噶爾台吉今年四月津巴來得台  
吉書云我欲取阿爾台台吉尚未曉

大皇帝之意我果有取阿爾台之心大兵豈肯盡撤  
我撤大兵即可知

大皇帝之意矣阿爾台乃天定交界爾父渾台吉時  
阿爾台以南原無厄魯特游牧自滅噶爾丹博  
什克圖以來我等建城駐兵其地衆所共知其

不令爾衆游牧者原欲以阿爾台為閒地兩不相取彼此隔遠庶永相和好不起爭端耳今台吉反云難以讓給試思阿爾台果係誰地誰能讓給

大皇帝據理諭爾剖斷甚明台吉尚爾飾說是不願休息衆生也論說滋多空勞往返總之阿爾台可以給爾與否台吉宜再詳思不可偏執利己之見也又謂逼處則有害我等游牧彼此相持

誰受其害尚在未定

大皇帝洞鑒留作隙地正欲廣教安民耳台吉若欲如前者首禍興兵是勞苦衆生皆爾之故於我無涉也來書又言興兵構怨遠亦可至我

大皇帝諭令分畫疆界原欲爾我自息兵爾誠遵肯定議我兵必不為禍始亦不復向科卜多居住倘爾復造釁端我惟坐待其來並不煩內地兵惟盡我喀爾喀之力上報

主恩孰是孰非孰好生孰不好生自有

天鑒我部惟體

大皇帝仁育之心防邊居守勿為禍始勞苦士馬而  
已台吉其知之又謂我卡倫逼近阿爾台故爾  
生疑擒此二人自今卡倫宜向內撤按我等現  
在卡倫乃

聖祖仁皇帝時設立至今並未外移即議定地界卡倫  
豈可不立今欲令我內撤是強以難行之事也

又謂毋近阿爾台游牧或致生事台吉果遵

大皇帝諭旨止議定界於理甚合於爾亦無甚難行  
今反言生事是猶意在興兵也惟末云當告知  
部院大臣奏聞

大皇帝以廣黃教以安衆生知台吉雖多飾辭仍意  
在求和耳我已舉大略奏

聞欽奉

大皇帝諭旨噶爾丹策零遣吹納木喀來時諸事俱

經降旨曉諭何彼尚未深悉朕意彼既行文於爾  
爾可再以朕意曉諭之書至台吉其詳審是非利  
害遣使達誠如爾難於遣使我當代奏令爾使  
赴京共成和好若仍牽率借端於事何益奏入  
報

聞

甲申

命種地綠旗兵毋庸再撥

額駙策凌等奏言前令卓鼐等往勘鄂爾昆可  
耕地畝實可給三千人耕種即以今年換班綠  
旗兵六百再另撥一千九百共二千五百名令  
一千五百名擇地耕種令一千名分駐塔米爾  
鄂爾昆兩處防守城池倉庫其種地事務即令  
總兵官管理暇時仍令操演訓練遇有撥遣可  
成勁兵一隊矣總理王大臣等議覆據奏除駐  
防兵外當用一千五百人耕種今軍營綠旗兵

六百并罪人計一千有餘不必更撥兵丁前往  
又現在遵

旨議運軍糧不必另議撥兵種地奏入  
上從之

五月丁未

命內扎薩克等防秋兵丁在本處備調

總理王大臣等奏言臣等以理藩院所報內扎  
薩克等沿戈壁防兵及游牧處備兵之數具奏

得

旨觀內扎薩克王等所報沿戈壁防秋駐兵所需馬匹糗糧俱伊等自辦但此兵止令其豫備用與不用尚介兩可若每年如此則蒙古等不勝其累倘必須遠駐人畜並困於往返宜如何加賞與其每年虛糜帑項與出兵無異不若令其在游牧處豫備以候調遣遇有調遣之處倍加賞賚辦理啓行著詳議具奏并移咨詢問額駙策凌此兵在游牧

處豫備有益與否令據所見奏聞臣等伏思內扎  
薩克兵沿戈壁駐防雖聲援稍近但六盟長下  
三千兵分駐六處相距數百里力弱勢單即歲  
加

恩賞未必得收其用不但虛糜帑項而蒙古等往返  
如織勞費殊甚若令三千兵亦在游牧處豫備  
於聲援不致遲悞而伊等亦不甚勞苦應行文  
扎薩克等令防秋兵暫停啓行與游牧處豫備

兵八千名同聽調遣即於本處駐劄其兵丁馬  
畜軍器整理儲備聞調即行無悞時刻又查前  
次調遣內扎薩克蒙古官兵賞王貝勒俸一年  
各台吉銀一百五十兩章京銀一百二十兩副  
都統銀一百兩叅領銀八十兩佐領銀六十兩  
驍騎校銀四十兩兵丁銀二十兩其鹽茶口糧  
及僕從人役悉分等支給此兵若有調遣請如  
前例賞給至移咨額駙策凌令其具奏俟奏到

再議奏入得

旨依議速行尋策凌等奏言游牧處所撥防秋兵丁應令各游牧所在豫備每年六月該管盟長扎薩克等各令兵丁整頓器械候京城遣賢能大員七月初間往勘再令六盟長屬下撥兵分二隊每隊以大銜扎薩克一人統之以西林郭勒烏蘭察卜伊克招三盟長兵為首隊招烏達哲里木卓索圖三盟長兵為次隊緩急有事一面

具

奏一面調遣令統領之人迅速率往其每隊由某路入援之處臣等臨時酌定而行王大臣等議覆應如所請其請遣大臣往勘每隊應遣大臣一員章京一員俟臨期令部臣開列侍郎副都統等職名奏請奏入得

旨內扎薩克等游牧處豫備兵丁最為緊要著今年即派大臣官員等往勘餘依議尋

命永興等前往查勘

六月甲戌

命移呼倫貝爾駐兵家屬於鄂木博齊等處屯種

將軍額爾圖奏言駐防呼倫貝爾之索倫達呼

里巴爾虎兵向賴糧米度日而其地並無可耕

又道通俄羅斯所關緊要若令悉撤但以新兵

守邊未協機宜臣等今叅領那木求等相度附

近并詢問衆兵並言惟興安山嶺之陽鄂木博

齊及雅爾河飛等處地勢寬平水草肥美既可  
屯駐兼宜耕種若使我等移居其地每年往呼  
倫貝爾更番駐防甚便臣等議得呼倫貝爾兵  
二千名已撥赴軍營僅餘一千駐防不便更令  
他移請以三千兵丁之妻子盡移鄂木博齊等  
處居住耕種令總管一員率兵千人至呼倫貝  
爾防守俟軍營二千人撤還時仍令更代駐防  
總理王大臣議覆應如所請奏入得

旨著仍派塞楞額總管餘依議

秋九月辛卯

命哈岱來京

上諭總理王大臣等曰軍營叅贊大臣哈岱頗著勞績年老無子著調回京師其員缺著護軍統領馬尼補授前往更換

癸巳

準噶爾回民米爾阿書爾來降

命賞給安插如例

閏九月丙辰

命侍郎杭奕祿等仍留駐西藏

副都統納蘇泰奏言侍郎杭奕祿請撤駐藏兵  
奉

旨觀杭奕祿所奏貝勒頗羅鼐等深以內地之兵在  
藏駐劄於伊等有益前

皇考特憫念唐古忒人衆恐內地之兵久經駐藏或有

累伊等思欲撤回若果有益數百兵丁所費糧餉  
幾何著將此駐防與臺站兵暫停撤回照舊換班  
駐劄俟一二年再定副都統納蘇泰往駐日久著  
回京杭奕祿仍留藏與總兵官周起鳳一同駐劄  
辦事其應換部員筆帖式著該部派遣更替臣謹  
遵

旨於八月十五日即以印交杭奕祿九月初一日起  
程奏入報

聞

壬申

命覺和托總管阿爾台軍臺白泰協同辦事

辛巳

準噶爾部人達什來降

命賞給安插如例

冬十月丁未

準噶爾部人策凌古爾巴納來降

命賞給安插如例

庚戌

命籌辦設廠牧馬事宜

上諭總理王大臣等曰國家馬政最關緊要必平時牧養蕃息斯緩急可以備用從前用兵之時需用馬匹俱發帑採買為數甚多且諸王等俱有進獻之馬近既撤兵此項馬匹未見下落即云每年有倒斃者亦不過百匹中數匹而已其應有之馬作

何詳查辦理夫牧養馬匹必須經理得宜俾孳生  
繁庶日見其多方為有益然以無事之時而頻年  
飼養不特糜費國帑且恐畜養過多草料騰貴於  
兵民均有未便現今籌議馬政必經費有節而又  
孳生繁盛乃為策之善者其如何分設廠地牧放  
俾永遠有益之處著總理事務王大臣會同八旗  
大臣該部詳悉妥議具奏至於京師亦須用馬匹  
而廠地多在口外未免離京稍遠即如本年八月

朕躬詣

秦陵兵部奏請將京城八旗出廠馬匹調回應用夫以口外馬匹調至京城用後仍須發回則往返之間已致疲乏又豈能濟一時之用乎附近京師如密雲熱河諸處有可安設馬廠者亦宜酌議安設則調用更屬近便令諸王大臣等一併會議具奏

十一月戊午

定邊副將軍額駙策凌奏報鄂爾昆等處秋成

收糧共五千四百四十五石有零得

旨下部知之

壬戌

準噶爾回民薩特奇率親屬五人來降

命賞給安插如例

命額駙策凌及台吉額默根來京

先是額駙策凌令台吉額默根等持答噶爾丹策凌書一通至準夷界上有達什敦多卜等接

見同至卓索圖和碩見台吉德齊特宰桑孟克  
博羅特告以來意德齊特等即撥三十餘人令  
送往伊犁額默根告以奉命只令致書不便前  
往會噶爾丹策零已先期遣博巴來迎遂於九  
月初七日至伊犁初九日見噶爾丹策零致書  
閏九月初四日噶爾丹策零告額默根云有奏  
大皇帝一書又與車臣汗一書我遣宰桑達什博吉  
爾二人為使二十四人為從與爾同行遂於初

五日起程十月二十日至布拉罕之察罕托輝  
額默根馳驛先至軍營額駙策凌以

聞且奏言前者與噶爾丹策零書原有如難於遣使  
當為代奏令爾使入京之語觀此次遣大宰桑  
前來定有求和之意可否令夷使進京又臣以  
年例當入

覲夷使到時可否告以臣已奉

旨赴京即令使者來京如蒙

俞允軍營印信應暫令何人署理伏候

欽命奏入得

旨著額駙策凌率台吉額默根馳驛來京副將軍印  
務暫令海蘭護理夷使達什等勿令窺伺軍營及  
蒙古游牧處導彼從口外行走并護送來京

丙寅

準噶爾部人策凌回民古爾巴勒來降

命賞給安插如例

辛未

命大學士鄂爾泰等仍辦理軍機事務

上諭內閣曰昨莊親王等請裁總理事務辭意懇切  
朕無奈允行但西北兩路軍務尚未完竣朕日理  
萬幾有時命就近交辦事件從前

皇考時辦理軍機事務曾特派大臣今著大學士鄂爾  
泰張廷玉公訥親尚書海望侍郎那延泰班第照  
舊辦理

十二月丙午

酌定準噶爾使臣達什等至京事宜

大學士鄂爾泰等奏言此次準噶爾來使達什  
博濟爾等到時請即引至

圓明園宮門跪伏理藩院閱受表文并貢物繕譯  
呈

覽引來使至吏部朝房列坐

賜食畢館之於聖化寺道經額駙策凌寓即令其遞

送噶爾丹策零與額駙書所有給與來使食物  
器用夫役驛馬請悉如吹納木喀例令各處支  
給辦理奏入得

旨著台吉額默根并派理藩院官一員馳驛前往迎  
問達什來情伊等如係特差奏疏之人即照爾等  
所議接受奏疏如係差向額駙策凌處送書之人  
到時即帶往額駙策凌住處呈遞來書額駙策凌  
看過所與伊書再接受奏疏轉奏餘依議

乾隆三年春正月丁丑

準噶爾使臣達什等至京進表

先是辦理軍機大臣等奏言達什等至京其致  
額駙策凌書係答額駙前書之語謹先繙繹進  
呈至噶爾丹策零所上表文及貢物請於本月二  
十四日令達什等恭進奏入報

聞至是理藩院導達什等至

圓明園大門跪進額駙策凌受之繙繹轉奏表文

曰準噶爾台吉噶爾丹策零具奏恭進

大皇帝聖明雍正年間

世宗憲皇帝與我父當日情事

大皇帝既盡知之不敢復瀆陳近者屢欲遣使恭請  
聖安因前歲吹納木喀齋回

勅書內有爾誠遵

皇考前旨定界則遣使來不然亦無庸復遣之

諭竊思遵照

大皇帝諭旨我屬下人不得至阿爾台山實有未便  
倘冒昧陳請又恐有乖

諭旨勢不得已暫爾停遣去秋我邊界人言蒙古在  
我境內安設卡倫携二人來因念既不得遣使  
事又不容中止不若即藉此二人致書車臣汗  
令其轉達車臣汗報書令我繕奏遣使一切情  
事當代為詳悉具陳故今復遣達什等入奏向  
來阿爾台山本係我部游牧之地若盡令移住

山陰恐地窄不能容納多人請嗣後喀爾喀與厄魯特各照現在駐牧無相掣肘庶幾彼此兩安以廣黃教以息羣生伏祈

大皇帝鑒憫隨表進貂皮三十一張奏入報

聞

命侍郎阿克敦等使準噶爾議界

上諭軍機大臣等曰閱準噶爾噶爾丹策零遣使求額駙策凌轉奏之疏甚屬恭順其事有易竟之機

可遣使齎勅前往與噶爾丹策零將定界之事定議完結著侍郎阿克敦充正使御前三等侍衛旺扎爾乾清門頭等台吉額默根充副使將應議事件皆明悉曉諭之即與準噶爾來使一同起程其帶領來使瞻仰之事應如何辦理并著詳議具奏  
尋

命阿克敦等各賞銀一千兩整裝

命曉諭準噶爾使臣達什等

上諭辦理軍機大臣等曰照看準噶爾來使仍派常  
明海望應賞物件著賞給曉諭來使前因爾等致  
書額駙策凌且稱另有奏摺是以令爾等至京照  
例給與口糧等物派章京等照看今據額駙策凌  
將噶爾丹策零表文轉奏大皇帝覽畢嘉與噶爾  
丹策零恭順故又特派大臣照看爾等

戊寅

命賞副都統達爾佳等

辦理軍機大臣等奏言喀爾喀台吉額默根與副都統達爾佳佐領烏巴什由額駙策凌處率兵丁十二人差往準噶爾部還額默根已蒙

恩授頭等台吉其達爾佳及各兵丁等應否量加賞給奏入

命賞達爾佳等銀緞有差

命和托克等率兵赴鄂爾昆更代

辦理軍機大臣等奏言駐防鄂爾昆東三省兵

去年已代其半餘兵二千五百今年當代應撥  
東三省兵二千牧廠兵五百前往東三省兵應  
以京城護軍統領等官二員率之牧廠兵應以  
奉天等處副都統一員率之謹開職名進

呈奏入得

旨著和托克博秀管轄東三省兵和義管轄牧廠兵  
二月丙戌

拉達克汗德忠那木扎爾上表進貢

命頒勅加賞以示獎勤

駐藏侍郎杭奕祿等奏言貝勒頗羅鼐以額納  
特可克部落拉達克汗德忠那木扎爾所上表  
文及貢物交臣轉奏查拉達克汗德忠那木扎  
爾乃尼瑪那木扎爾之子父子並感

國厚恩凡得準噶爾消息輒附頗羅鼐以

聞自

聖祖仁皇帝

世宗憲皇帝數加恩賚今復進表貢物若更頒予

勅命量施

恩澤拉達克汗德忠那木扎爾當益勸勉內向傾心  
矣辦理軍機大臣等議覆應如所請奏入

命賜德忠那木扎爾勅書一道加賞緞匹磁器有差

甲午

準噶爾使臣達什等入

覲

先是辦理軍機大臣等奏言噶爾丹策零使臣

達什等請於本月初九日令其瞻仰

天顏奏入得

旨報

聞至是

上御正大光明殿令達什博濟爾等入

覲

上諭達什等曰定界之事朕前降旨甚明今以額駙

策凌奏請故許見爾等噶爾丹策零奏章朕已觀  
覽其與額駙策凌書亦經奏聞奏內稱喀爾喀與  
厄魯特請悉駐牧如故彼此兩安庶幾推廣黃教  
休養羣生伏乞大皇帝鑒憫觀噶爾丹策零此次  
奏言極其恭順有誠心求和之意朕甚嘉之爾等  
舉止亦謹慎可嘉但於分界之處仍未指明尚屬  
朦朧蒙古游牧無常冬夏隨時遷徙若不指定山  
河為界日後邊人寧保無爭乎必彼此各守其界

無得踰越庶可永固和好若噶爾丹策零未嘗明  
諭爾等爾等自不敢擅議朕當另遣大臣前往與  
噶爾丹策零詳悉定議又爾等曾告額駙策凌乞  
我國卡倫稍向內移卡倫之設由來已久於今豈  
得議移且噶爾丹策零奏中並未及此據爾等私  
見陳請不惟與噶爾丹策零所奏不符亦非爾等  
分所宜言也達什奏言此係噶爾丹策零口囑不  
然使臣等何敢妄言今

大皇帝既許遣使自可與噶爾丹策零面議而定  
上諭曰爾漫云噶爾丹策零口囑便爾瀆陳若朕遣  
使至爾部彼不過遵旨而言何敢於勅諭之外復  
增一言朕於中外共主無分喀爾喀與厄魯特咸  
一體視之並無欲益喀爾喀損厄魯特之意今噶  
爾丹策零請邊界人居住如故此事尚可俯允若  
乞我卡倫內徙殊未合理爾部邊界人且不肯移  
徙我

聖祖暨

皇考時舊設卡倫反可動耶朕於厄魯特尚無異視之心豈肯曲從爾意轉騷擾我喀爾喀乎凡事合於理朕無不允不然雖百請亦不允也朕即日遣使噶爾丹策零其遵旨定議以固信好朕面諭之言爾等詳悉記憶歸告噶爾丹策零爾等臨行時朕尚有勅書付朕使者頒示噶爾丹策零知悉尋賜達什等銀兩緞布有差

甲辰

命甘肅提督李繩武赴哈密駐防

三月辛酉

命海蘭管理烏里雅蘇台駐兵

護定邊副將軍印海蘭奏報阿成阿病卒奏入  
得

旨烏里雅蘇台駐防兵丁即著海蘭管理俟額駙策  
凌到軍營日即起程前往

戊辰

賜準噶爾台吉噶爾丹策零勅書

奉

天承運

皇帝詔曰諭準噶爾台吉噶爾丹策零前歲爾遣吹  
納木喀來朕以廣教安民之故欲與爾議定疆界  
罷息干戈在朕寧有食言之理爾誠遵我

皇考諭旨以阿爾台山為分界止請喀爾喀游牧稍令

移徙勿動原設卡倫朕尚可俯允降旨指明喀爾喀游牧所止之處乃爾並不遵

旨反請以哲爾格西喇呼魯蘇為爾邊界如此則遣使何益故朕復諭以遵我

皇考前旨則遣使不然則無庸復遣使降旨甚明此次爾令達什來致書額駙策凌又有進朕奏章乞額駙轉奏朕故召爾使入見又閱爾奏內云請令喀爾喀與厄魯特游牧俱照現在居住無相牽掣彼

此兩安言亦近正但分界地名未經指明蒙古游牧無常冬夏隨時遷徙若不指定山河為界地日邊境細人或起紛爭仍難要久以爾奏言恭順故朕特命大臣前來朕使到時爾與酌合機宜必使分界之事此次即得定議若仍不揆情理偏執已見托故推諉則於事無益即往復遣使亦徒然耳朕為天下共主凡各部民人皆欲令其安生並無彼此異視之意果事屬兩便朕無不允若有一不

便任誰奏請總無偏聽之理為此特降勅書命侍郎阿克敦侍衛旺扎爾台吉額默根同爾使達什等前往隨勅賜各色采緞十端

命額駙策凌亦致書答噶爾丹策零隨書用各色采緞四端

辛未

恩卹駐防哈密提督樊廷

上諭內閣曰固原提督樊廷領兵多年効力邊疆威

勇素著前因駐防哈密身患痰疾奏請解任調理  
朕心軫念令回固原之任并賞給參藥命太醫馳  
往診視冀其痊可今見遺摺知病已不起而伊彌  
留之際猶於邊防事宜諄切陳奏披覽之下實不  
勝憫惻著大學士查郎阿經理其喪將柩送回內  
地并賞帑金五千兩為辦喪葬之用其應得卹典  
該部從優議奏所有一等輕車都尉即令伊子樊  
經文承襲嗣後子孫仍准照世次襲職又伊奏稱

父葬成都母葬涼州祖塋今一子年幼扶柩拮据  
難以遠赴成都懇請恩准葬於母墓之側等語著  
大學士查郎阿與伊子熟商如成都舊有產業或  
將伊母送往合葬如不願遠赴成都即將伊父骸  
骨移至涼州葬於一處一切費用著大學士查郎  
阿於恩賜銀兩外另行賞給樊廷所奏邊防事宜  
著辦理軍機大臣定議具奏

平定準噶爾方略前編卷四十三

欽定四庫全書

平定準噶爾方略前編卷四十四

乾隆三年夏四月辛卯

準噶爾部人巴雅爾起塔特伯勒克等來降

命賞給安插如例

五月戊午

命暫停運送軍營米石

定邊副將軍額駙策凌奏言大兵既撤每月需

餉無多軍營現貯糧十七萬餘石屯田米三萬餘石又范毓麟每年運到糧二萬石舊米支盡始動新糧蒙古等處積雪春融必有潮氣入夏未乾不時揚曬僅免霉爛虧折實多兼患鼠耗軍糧所關重大而西路橋灣布隆吉爾等處所存米石前者劉於義奏請每年一斛許耗一升業已議行此處應請一體辦理其司倉各官耗少者議叙多則劾治追償亦請如西路之例大

學士等議覆曰今年應運糧俱已起程應無庸  
議請自明年為始暫停輓運二三年後再行請  
旨奏入

上從之

乙亥

命根丕勒等游牧仍居舊處

上諭辦理軍機大臣等曰據額駙策凌奏稱喀爾喀  
公根丕勒敏珠爾因台吉特克什等屬人產業牲

畜傷耗應行輪廠羊隻業已奏准展期又經各扎薩克會議量力幫助牛羊而生理尚艱請令伊等游牧毋過綽卡圖等處有可漁獵畜牧之所暫令移居若有事仍令內移似可無虞等語前者以喀爾喀游牧太遠可虞令向內遷移今雖邊境無事現在遣使往議分界事尚未定遽令扎薩克等游牧外展準夷聞之妄生疑惑於事無益伊等游牧且勿展放況羊隻既得展限又經各扎薩克幫助

目下尚可度日可行文額駙策凌諭根丕勒等游牧處所宜仍其舊

準噶爾部人顏渾來降

命賞給安插如例

秋七月甲寅

準噶爾部人鄂勒錐來降

命賞給安插如例

庚申

命管領呼倫貝爾駐防兵丁塞楞額來京以副都統  
都依那代之

八月己丑

準噶爾部人尼瑪特古斯博羅特三人來降

命賞給安插如例

九月甲寅

命副都統紀山代杭奕祿駐藏賞銀五百兩

丙寅

準噶爾部人巴顏烏勒木濟敦多克固木扎卜  
等四人來降

命賞給安插如例

冬十月

命額駙策凌來京以雅爾圖暫管定邊副將軍印務  
上諭辦理軍機大臣等曰據額駙策凌奏稱遣往準  
噶爾侍郎阿克敦等與噶爾丹策零使臣哈柳等  
於十月二十日左右可到巴里坤此次遣使之事

其始原係額駙策凌辦理現在軍營無事又夷使至京尚有應議一切著額駙策凌於十二月初十日後夷使未到之前按程至京其將軍印信著暫交雅爾圖護理又

諭曰據額駙策凌奏已移知安西提督李繩武著即行文查郎阿夷使至肅州時照管存留人畜及貿易貨物等事著派一幹辦道員與肅州總兵官妥協辦理至來使進京所需牲畜路費等項仍照例

給予

額駙策凌奏報鄂爾昆等處秋成收糧共八千七百五十三石有零得

旨下部知之

十二月戊戌

準噶爾台吉噶爾丹策零遣哈柳等隨侍郎阿克敦等至京進表

夷使哈柳等跪進表文曰準噶爾台吉噶爾丹

策零具奏恭進

大皇帝聖明去年令達什等以阿爾台游牧事具奏  
奉

大皇帝諭旨爾請喀爾喀與厄魯特以阿爾台山為  
界俱照現在駐牧無相掣肘言辭恭謹朕甚嘉之  
故復遣使前往幸蒙

聖恩鑒允不勝懽忭又

諭旨有云分界之處尚未指明蒙古游牧無定若不

指定山河為界日後邊民生繫於久遠之計仍無  
裨益前者我遣吹納木喀入奏亦正為此耳今議  
定界請循布延圖河南以博爾濟昂吉勒圖烏  
克克嶺噶克察等處為界北以孫多爾庫奎多  
爾多輝庫奎至哈爾奇喇博木喀喇巴爾楚克  
等處為界我邊界人等仍在山後游牧不得越  
阿爾台嶺其山前居住蒙古部人只在扎卜堪  
等處游牧彼此相距遼遠庶可兩無牽掣謹此

具奏仰祈

睿鑒前者彼此致生嫌隙祇以

大皇帝兵至科卜多遂於界內築城駐兵之故今托爾和等處恐復如此惟

大皇帝區處若蒙見允邊界自此而定卡倫大半向前其布延圖托爾和二卡倫並在我國境中亦祈

大皇帝垂鑒再車臣汗告我使人班禪額爾德尼已

經圓寂詢來使云是實我厄魯特經典中載班  
禪額爾德尼乃掌教大喇嘛也如果圓寂當建  
塔諷經意欲遣我人赴藏布施以廣黃教以福  
羣生亦惟

大皇帝鑒允謹奏隨表進貂皮三十張奏入報  
聞

丙午

準噶爾使臣哈柳等入

觀

上諭哈柳等曰去年爾來使達什等賫噶爾丹策零  
奏章言詞恭順朕故遣使往諭此次所奏乞令托  
爾和布延圖兩處卡倫稍稍內移此事斷不可行  
便與不便爾等亦知之且我

聖祖皇帝時所設卡倫至今豈可移動乎但噶爾丹策  
零所云游牧不敢越阿爾台尚近於理念爾等遠  
來召爾入見若噶爾丹策零止請彼此不越阿爾

台此次便可定議乃復言及卡倫故朕令大臣等  
與爾再議爾為噶爾丹策零大宰桑爾台吉本意  
爾無不知除所奏外尚有口囑之言否哈柳奏云  
並無口囑之言但前者以

大皇帝之兵於科卜多築城駐兵致起釁端今噶爾  
丹策零之意以托爾和布延圖離科卜多甚近  
恐日後復於兩處築城駐兵故奏請乞

恩耳

上諭曰現今噶爾丹策零所奏不使游牧卡倫越阿爾台甚屬信實朕甚嘉之至托爾和布延圖等處朕已降旨斷不修築城屋駐劄兵丁朕為中外共主所諭豈有改變之理爾等還其詳記朕旨曉諭噶爾丹策零哈柳奏言祈

大皇帝以所降諭旨繕寫特遣使臣往與噶爾丹策零面議

上諭曰無庸遣使爾等起程時另有勅書即付爾等

頒示噶爾丹策零

乾隆四年春正月丁巳

命導夷使哈柳等往見額駙策凌議事

先是噶爾丹策零致書額駙策凌曰字奉車臣  
汗前者汗為邊界卡倫事札到緣由我業已知  
曉今將一切事俱已陳奏

大皇帝又因博克達班禪圓寂之故欲遣人前往諷  
經布施亦經奏懇

大皇帝睿鑒車臣汗係辦理大事之人望乞方便額駙策凌以

聞得

旨與夷使議事著額駙策凌另見軍機大臣等請於  
本月二十六日導哈柳等至額駙策凌處相見  
奏入報

聞

壬戌

賜夷使哈柳等緞布銀兩有差

二月甲午

命加恩往使準噶爾喀爾喀頭等台吉額默根等有

差

上諭辦理軍機大臣等曰喀爾喀頭等台吉額默根  
兩次使往準噶爾著有勞績加恩授額默根為扎  
薩克頭等台吉到京時仍在乾清門行走管旗章  
京滿集拉此次亦前往準噶爾加恩賞銀二百兩

丙申

準噶爾部人孟克特穆爾與其弟扎木素來降  
命賞給安插如例

庚子

賜準噶爾台吉噶爾丹策零勅書

奉

天承運

皇帝詔曰諭準噶爾台吉噶爾丹策零前歲爾遣達

什等進奏言辭恭順朕甚嘉之因分界之議未曾  
指定地名故朕又命侍郎阿克敦等前往與爾分  
別定議今爾遣哈柳同來疏言今欲定界請循布  
延圖河南以博爾濟昂吉爾圖烏克克嶺噶克察  
為界北以孫多爾庫奎多爾多輝庫奎至哈爾奇  
喇博木喀喇巴爾楚克為界厄魯特無踰阿爾台  
嶺蒙古亦止在扎卜堪游牧伏乞大皇帝睿鑒夫  
定界之議非自今始爾父策妄阿喇布坦已經陳

請誠以喀爾喀游牧原無定處必指定山河為界  
庶彼此不致紛爭朕為天下共主無分畛域一視  
同仁凡有奏請可行則允之不可行則却之雖百  
請亦不允也爾言厄魯特無過阿爾台游牧其言  
近理朕即信之又請蒙古止居扎卜堪現今蒙古  
游牧原未嘗踰扎卜堪也爾又請托爾和無築城  
駐防朕既降旨撤兵托爾和等處安得復如前此  
科卜多有築城駐兵之事已面諭爾使哈柳矣必

無改悔之理也但爾請循布延圖河南以博爾濟  
等處北以孫多爾庫奎等處為界謂卡倫大半向  
前布延圖托爾和兩卡俱在爾國界中意欲我卡  
倫稍向內移此必不可行之事爾豈不知乃復牽  
率而言乎況設卡防守所用不過數人何關輕重  
然自我

聖祖時設立之卡倫豈可於今忽移動之乎夫休兵息  
民永歸和好即定界與否亦非要事但使彼此游

牧互相隔遠而卡倫則安設如故至科卜多并不  
復駐兵止於每年應略地時各遣二三十人前往  
巡視約不相害如此區處爾之猜疑亦可盡釋矣  
台吉其遵旨定議俟覆奏到日朕當明諭喀爾喀  
令其游牧永遠無過扎卜堪也如是則事體聲名  
彼此均有裨益此外更無應行另議之事朕故不  
復遣使即以勅書付哈柳齋往台吉其熟思之如  
遵朕旨則遣使覆奏不然數遣使何為爾又奏稱

班禪額爾德尼圖寂欲遣人往藏諷經布施伏祈  
鑒允朕為大君有能奉教之人豈忍阻抑但從前  
爾部人潛往西藏殘害土伯特今若經行彼地土  
伯特懷憤生事亦可未定爾誠心布施須俟遵旨  
定議後準用百人赴藏朕當特遣官弁護送隨勅  
賜各色緞十端

三月壬子

命免寧夏官兵應繳銀兩

上諭內閣曰前岳鍾琪撥寧夏官兵一千名移駐涼州旋以駐涼兵丁已足敷用將此兵撤還所有領過賞銀一萬七千兩欽奉

皇考諭旨暫免追繳俟大軍凱旋之後再行奏聞請旨今大學士查郎阿具奏請旨前來朕思兵丁等所領賞銀歷年已久此時料難繳還况寧夏地方去冬被災尤當加恩撫卹此所欠應繳銀一萬七千兩悉著豁免該督等可即出示曉諭衆共知之

夏四月乙酉

額駙策凌奏報商人范毓韻運米至營

額駙策凌奏言范毓韻運至應交米二萬石又  
豫備折耗米一千石已交軍營訖此係賠補  
欠項其豫備米石應入次年正項奏入報

聞

丙戌

命停止運送軍營米石

辦理軍機大臣等奏言據額駙策凌奏報軍營  
現存米石足支兵餉六七年儲蓄過多恐致折  
耗於事無益請自明年起停止運送俟二三年  
後令額駙策凌酌量應運與否另行奏請奏入  
上從之

乙巳

巴爾布國三汗入貢

駐藏侍郎杭奕祿奏言西藏西南三千里外巴

爾布國有三汗一名庫庫木一名顏布一名葉楞雍正十二年曾遣使恭請

聖安近年三汗彼此交惡數尋戰攻臣遣貝勒頗羅鼐  
宣諭

皇上好生之德中外一視皆如赤子爾等宜罷息干戈結好和衆以仰報

國恩三汗咸懽忻聽命以三部落戶口數目遣使呈報庫庫木等各進金銀絲緞及珊瑚念珠等

物交頗羅鼐轉乞臣等奏

聞尋部議請加

恩給賞奏入

上從之

五月丁卯

命豫發軍營餉銀

定邊副將軍額駙策凌奏言軍營現貯銀止二十六萬兩支給明年春季兵餉外所存無幾軍

需關係綦重應豫為籌辦懇

勅部今年冬即於明年應解銀兩內豫發四十萬兩

備用奏入得

旨照所請行

六月丁酉

命賞內扎薩克王貝勒暨官兵等銀緞有差

辦理軍機大臣等奏言乾隆三年九月初七日

奉

旨內扎薩克六盟長名下游牧豫備兵丁每年派大  
臣等查閱今已連閱二年俟三四年後蒙古等應  
如何加恩賞賚之處著辦理軍機大臣等議奏臣  
等酌議統領兵丁科爾沁王伊錫班第奈曼王  
阿咱喇蘇尼特王汪齊蘇隆各賞龍緞一疋  
蟒緞一疋大緞四疋喀爾喀貝勒拉旺多爾濟  
蘇尼特貝勒錫禮鄂爾多思貝勒鄂衣羅卜扎  
木蘇巴林貝子扎什納木札爾喀喇沁公丹津

烏喇特公達里木吉禮第各賞龍緞或蟒緞一  
疋大緞三疋協理台吉塔布囊十七人各賞大  
緞一疋官緞二疋閒散台吉塔布囊二十七人  
各賞大緞一疋官緞一疋管旗章京副都統二  
十二人各賞官緞一疋彭緞一疋叅領佐領一  
百二人各賞官緞一疋驍騎校六十五人各賞  
彭緞一疋兵丁一萬一千名各賞銀三兩今歲  
初屆三年所有銀緞等項俟明年遣大臣前往

閱兵時持往驗明賞給奏入

上從之

辛丑

建威將軍王常等奏報綏遠城建築城垣

王常等奏言臣奉

命建築綏遠城城垣衙署廟宇兵房倉廩堞樓橋梁  
一切工程於乾隆二年二月初七日興工至四  
年六月二十二日告竣形勢壯麗保障周密計

用過銀一百三十萬兩有奇另行繕冊報銷奏  
入報

聞

秋七月丁巳

準噶爾部人喇嘛薩木黨重內率弟恩克伯勒  
克巴圖來降

命賞給安插如例

甲子

命任懷德管理東路卡倫

上諭內閣曰據總統駐防哈密等處提督李繩武奏稱總兵官王邦寧駐劄塔勒納沁總理東路卡倫於今年三月患病迄今半載尚未痊愈可否准其進口回任以便醫治等語王邦寧著回本任調理其員缺著興漢鎮總兵官任懷德補授其興漢鎮印務著漢中副將呂瀚署理

九月丙午

準噶爾部人托克托來降

命賞給安插如例

辛未

命阿蘭泰暫管軍前糧餉事務

上諭內閣曰盛京兵部侍郎員缺著常安補授常安著來京請訓再赴奉天之任其所管軍前糧餉事務著額駙策凌委員暫行管理尋策凌請以叅贊大臣阿蘭泰署理奏入報

聞

冬十月乙亥

準噶爾部台吉孟克率子格色爾津來降又回  
民胡岱巴克桑海來降

命授孟克三等侍衛餘悉賞給安插如例

丁丑

準噶爾回民伊斯拉木丁率妻來降

命賞給安插如例

丙申

命宥馬蘭泰罪

上諭辦理軍機大臣等曰岳鍾琪傳爾丹馬蘭泰均  
係軍前護罪之人岳鍾琪傳爾丹既加恩寬免馬  
蘭泰亦著從寬釋放

辛丑

命降調巡撫法敏赴北路軍營管理糧餉事務

壬寅

命額駙策凌來京議事

上諭辦理軍機大臣等曰據李繩武奏稱噶爾丹策零復差哈柳等為使前至哈密軍營約十二月初旬到京使者到時有應議之事著額駙策凌即起程來京其軍營印務著海蘭暫行護理

十一月丁未

準噶爾部人已扎爾齊里克特穆爾來降

命賞給安插如例

己未

準噶爾部人們都來降

命賞給安插如例

癸亥

準噶爾送還喀爾喀喇嘛羅卜藏西瓦

駐防哈密提督李繩武奏言前者被掠之喀爾喀喇嘛羅卜藏西瓦與夷使俱至請先送至京  
軍機大臣等議奏曰羅卜藏西瓦額駙策凌供

養之大喇嘛也前者以請

安至京賞給如大喇嘛例既而被擄今始送歸請暫  
令歇息酌量給與盤費仍送還額駙策凌奏入  
得

旨著引見

上諭羅卜藏西瓦曰爾在準噶爾居住多年噶爾丹  
策零性情爾所深知嗣後有使臣至準噶爾或者  
使爾同往亦未可定爾感戴朕恩今惟勤習經卷

教誨弟子可也隨

賞賜佛像緞帕

十二月癸酉朔

封額駙策凌長子成袞扎布為世子

上諭辦理軍機大臣等曰額駙策凌至京入覲朕諭  
以噶爾丹策零送羅卜藏西瓦還時曾告以車臣  
汗妻子現在此間若車臣汗念之我當送還據額  
駙奏稱臣世世受恩深重前準賊入我游牧擄二

子及使婢一人而去若等應即自盡以報國恩苟  
且偷生至今尚在彼處居住全不知恥臣欲得此  
不肖之子何用且與國事何益噶爾丹策零性本  
詭詐臣若欲得二子彼必不論可否妄行干請所  
關非小國事為重臣斷無念子之意輸誠具奏夫  
父子之道關乎天性額駙策凌感激

皇祖

皇考及朕之恩止圖裨益於國家顧惜大義不思復與

其子相見朕心深為惻然思有以獎之其長子貝子成衮扎布漢仗好在軍前亦頗効力著加恩封為世子

乙亥

準噶爾部人博固木拜來降

命賞給安插如例

辛巳

命尹繼善辦理夷使進藏事宜

上諭辦理軍機大臣等曰噶爾丹策零奏請進藏熬  
茶其事著尹繼善辦理

壬午

準噶爾台吉噶爾丹策零遣使哈柳等至京進  
表

先是辦理軍機大臣等奏言夷使哈柳等到日  
一切典禮請如去年例至是哈柳等至行禮畢  
恭進表文曰噶爾丹策零謹奏

大皇帝前哈柳至奉

大皇帝勅書云休兵息民永歸和好即定界與否亦  
非要事誠使厄魯特不得過阿爾台山梁喀爾喀  
游牧亦無過扎卜堪庶幾彼此游牧隔遠如此定  
議俟回奏到日朕再降諭旨令喀爾喀等遵守事  
體聲名均有裨益竊思向來阿爾台為厄魯特游  
牧杭愛為喀爾喀游牧原無釁隙今誠廣教安  
民堅守舊約原不在定界與否前已再三陳請

今蒙

大皇帝鑒允不勝懼忭即此為定又蒙

諭旨卡倫係我

皇祖

皇考時安設仍應如舊其科卜多所在不復駐兵每年  
止遣二三十人前往略地斷不致彼此相害互有  
牽掣已降旨爾使哈柳寧有改悔如此則我心亦  
不疑托爾和布延圖兩卡倫自不妨仍舊矣又

大皇帝諭旨有云朕不阻奉教之人往者爾等潛往  
西藏殘害土伯特今遽經行彼地恐土伯特懷憤  
生事果誠心往藏布施俟遵朕旨定議後許用百  
人赴藏朕特遣官弁護送按前此起釁發兵騷擾  
是實今一意尊敬黃教斷不致生事但馱載什  
物百人不敷乞許用三百人至貿易之事令哈  
柳面懇允行隨表貢貂皮三十一張奏入報

聞

乙酉

命封貝勒頗羅鼐為郡王

上諭內閣曰西藏貝勒頗羅鼐遵奉諭旨敬信黃教振興經典練兵防卡甚屬黽勉著有勞績著加恩晉封郡王

壬辰

準噶爾使臣哈柳等入

覲

上諭哈柳等曰爾台吉噶爾丹策零奏章朕已觀覽  
悉遵諭旨朕深嘉與之朕為中外共主惟思與普  
天之下共享昇平今噶爾丹策零既遵朕旨定界  
嗣後近邊居人各安故土更無爭競永遠安生矣  
至所請進藏熬茶乞用三百人朕已允行至貿易  
之事朕命大臣與爾定議去年爾來今年又至克  
成和好爾與有榮施朕尚欲加恩於爾爾初到時  
即欲命爾進見因聞爾有足疾故至今日始令入

覲爾善自調理近年節時朕再令爾入朝

丙申


命哈柳等觀步踏

賜噶爾丹策零及哈柳緞疋磁器

上傳諭哈柳等曰此次爾台吉噶爾丹策零遵朕諭旨具奏甚屬恭順爾來正值新正朕有賜噶爾丹策零緞匹磁器爾可先令人持往給賜爾去年曾來今年又來以息事寧人之故往返再三克勝使

命朕甚嘉之今日適跳步踏是以召爾入觀往年  
朕亦出視但需時甚久朕在上汝等或不安今年  
朕特停止出視汝等可安坐暢觀隨

恩賜哈柳等緞匹磁器有差



平定準噶爾方略前編卷四十四